

MUIP sumbang RM175,000 untuk beli 50 komputer

[Mohd Rafi Mamat](#)
am@metro.com.my



Dr Asmadi (dua dari kanan) menyerahkan replika cek 50 unit komputer kepada Pengetua Kulliah Al-Lughah Waddin As-Sultan Abu Bakar, Lebai Idris Ali. FOTO MOHD RAFI MAMAT

Pekan: Majlis Ugama Islam dan Adat Resam Melayu Pahang (MUIP) menyumbang 50 unit komputer serta kelengkapan terkini bernilai RM175,000 kepada Kulliah Al-Lughah Waddin As-Sultan Abu Bakar, di sini.

Timbalan Ketua Pegawai Eksekutif (Baitulmal dan Operasi) MUIP, Dr Asmadi Abdul Rahman berkata, komputer itu untuk kegunaan pelajar melanjutkan pengajian di pusat pendidikan Islam itu.

Menurutnya, Kulliah Al-Lughah Waddin As-Sultan Abu Bakar antara pusat pendidikan terkenal dan tertua di Pahang yang melahirkan ramai golongan pendakwa serta guru agama terkenal.

"Komputer diberikan khusus untuk kegunaan pelajar di peringkat Sijil Tinggi Agama Malaysia (STAM) selain pelajar Program Tahfiz Bestari dan program kelas bahasa Arab.

"Ia untuk kegunaan pelajar yang mengikuti program persediaan sebelum melanjutkan pengajian ke Universiti Al Azhar, Mesir termasuk beberapa universiti di Timur Tengah," katanya.

Beliau berkata demikian pada Majlis Penyerahan Replika Cek Bantuan 50 Unit Komputer Bernilai RM175,000 kepada Kulliah Al-Lughah Waddin As-Sultan Abu Bakar, di sini, semalam.

Hadir sama, Pengarah Jabatan Agama Islam Pahang (JAIP), Datuk Zulkifle Ali dan Pengetua, Lebai Idris Ali.

Disiarkan pada: Julai 19, 2021 @ 1:39pm